

## In parlament giuven da Glion

Gl'atun vargau ei la cumissiun da giuventetgna dalla vischnaunca Ilanz/Glion seconstituida. Igl ei in gremi da habitontas e habitonts denter 13 e 25 onns. La cumissiun cumpeggia denter siat ed endisch commembers. Actualmein presidiescha *Sarina Casanova* da Glion-Strada la cumissiun. Quella seprepara per l'emprema sessiun da giuventetgna. Sonda, ils 22 d'avrel 2023 envida la cumissiun glieud giuvna dalla vischnaunca da discutir e debattar dalla mobilitad, da loghens da s'entupar e dil temps liber. (fmr/abc) Pagina 3

07.03.2023

## Emprema sessiun dalla giuventetgna da Glion

En tschun jamnas ei a Glion ina manifestaziun politica speciala. La cumissiun da giuventetgna ei vidlunder da far las davosas preparativas per la sessiun da giuventetgna Ilanz/Glion. La sonda dils 22 d'avrel 2023 debateschan giuvenils denter 13 e 25 onns dalla mobilitad, temps liber e loghens da sentupar.

Augustin Beeli/FMR

L'ordinaziun davart la cumissiun da giuventetgna Ilanz/Glion ei entrada en vigur igl 1 d'october 2022. Ella s'engascha pils giavischs ed interess dallas persunas giuvnas dalla vischnaunca. Finamira dalla cumissiun eis ei da promover ina politica activa, includer la giuventetgna ella participaziun politica. Vinavon duei ella realisar e sustener projects, prender posiziun tier temas relevants sco era s'engaschar per la collaboraziun denter las generaziuns. Quella cumissiun organisescha actualmein ils detagls dall'emprema sessiun da giuventetgna dalla vischnaunca Ilanz/Glion. Quella dieta ei sonda, ils 22 d'avrel 2023.

## Lavur en treis gruppas

Dacuort ha la cumissiun publicau il program detagliau dalla sessiun cugl invit da reservar il termin. «Participar astgan giuvenils denter 13 e 25 onns che han ragischs e ch'ei colligiai cun Ilanz/Glion», scriva la cumissiun culla presidenta *Sarina Casanova*. Dalla damaun allas 9.00 tochen il suentermiezgi allas 17.00 vegnan habitontas e habitonts da 13 tochen 25 onns a discutir e debattar dalla mobilitad, da loghens da s'entupar/veta da notg sco era dil temps liber/infrastructura. Quellas treis tematicas seresultan d'ina retschercha che la cumissiun da giuventetgna ha fatg a caschun dalla fiera da vinars la fin digl onn.

Il program dils 22 d'avrel 2023 entscheiva cun in plaid festiv da cussegliera guvernativa *Carmelia Maissen*. Ella ha promoviu essenzialmein quell'emprema sessiun da giuventetgna. Suenter ils plaids dalla presidenta *Sarina Casanova* e dalla presidenta dil parlament

communal, *Gierina Gabriel*, entscheivan ils treis differents luvratoris. En quella dalla mobilitad ei *Prasad Raja* ([www.subeez.ch](http://www.subeez.ch)) expert. Els ulteriurs ein *Roberto Giovanoli* e *Marco Bracher* experts dalla sparta. Suenten in gentar comunabel vegnan las treis gruppas a presentar il suentermiezgi lur conclusiuns e las propostas.

Dapi gl'atun vargau dat ei ella vischnaunca Ilanz/Glion ina cumissiun da giuventetgna. Quei gremi, elegius dalla suprastanza communal, cumpeglia denter siat ed endisch persunas. Silmeins duas ston esser dil scalem superieur dalla scola, duas denter 16 e 25 onns, in representant dalla suprastanza communal sco era ina persuna dil parlament communal.

Vinavon fa la responsabla per la lavur da giuventetgna part dalla cumissiun. Actualmein ei quei *Marianna Mögling*. La cumissiun ei activa te-nor il motto «dalla giuventetgna per la giuventetgna». *Sarina Casanova*, Glion/Strada, presidescha la cumissiun cullas suandontas commembras e commembers: *Luna Baruffol*, Ruschein; *Alice Bertogg*, Sevgein; *Leandro Bundi*, Rueun; *Selina Candin*, Sevgein; *Ivo Capaul*, Rueun; *Ladina Mittner*, Sevgein; *Marianna Mögling*, Cuera, e *Hannah Pfister*, Glion. La cumissiun da giuventetgna lavura tenor l'ordinaziun davart la cumissiun da giuventetgna. Quella basa legala ei entrada en vigur igl 1. d'october 2022.